

# Ils Grischuns conquistan il «HB» a Turitg

Dals 5 fin il 7 da settember datti ina festa gigantica cun il num «Züri retour»

■ **(anr/vi) I para da dar insatge gigantic, quai che Mariano Tschuor e ses comité han cuà ora per la festa grischuna en la staziun principala a Turitg. La festa stat sut il motto «Züri retour».** «Tgi che vul emprender d'enconuscher il Grischun, sto ir a Turitg.» Quest sentiment han ins, sch'ins legia il program da festa che ha lieu ils 5 fin ils 7 da settember a Turitg. La prominenz grischuna – saja quai culturala, politica u da sport – sa preschenta en fila.

La gronda surpraisa vegn ad esser la «Revue grischuna» en la quala 600 persunas mussan la cultura dal chantun muntgnard: I cumenza cun ils chors e va a finir il «rap» grischun. Ier a la conferenza da pressa a Turitg han cusseglier guvernativ *Claudio Lardi*, *Mariano Tschuor* e la gliueda da «Grischun Vacanzas» preschenta las occurrenz. Els han declarà daco ch'ins festivescha il giubileum «200 onns Grischun en la confederaziun» era en la metropola economica.

## Svelt reservar bigliet!

Per cumenzar gist cun ils custs. Mintga Grischun che less ir a la festa paja, sch'el va cun il tren, 2003 raps – pia 20 francs. Includ en il bigliet da tren è l'entrada a la «Revue grischuna» il venderdi saira u la sonda. Tgi che less visitar la revue sto dentant dar chommas ed immediat reservar il

bigliet. Tenor Tschuor è libers sulet anc 600 (da 3000) plazz.

La «Revue grischuna» stat en il center da la festività. *Paul Weibel* fa la reschia. Tenor el duai la revue esser ina chausa seriusa, legra, critica ed ironica. *Fortunat Frölich* segna per la direzziun musicala: Na gist ina simpla incumbenza, sch'ins tegna quint che 13 chors grischuns sa participeschan, plinavant musicas da differents stils, solists e chantadurs da tuttas spartas, tibas e furmazziuns da saut.

*Remo Arpagaus* fa il maletg da tribuna. Quai tuna simpel. I sa tracta dentant da la halla da la staziun a Turitg. Ella è «in zichel» pli gronda che las tribunas da teater usitadas. Ma l'installaziun che Arpagaus ha preschenta ier en in model cumpeggia l'entira halla. Ella emplencha ora la halla, uschia che mintga passant sto remartgar ch'i marscha insatge spezial en «Hauptbahnhof» u «HB» sco ils Turitgais dian mintgant.

## Solver gratuit

Turitg è la pli gronda vischnanca grischuna ordaifer il Grischun. Perquai manegia il schef-organisatur Tschuor ch'i saja giustifitgà da far festa en questa citad, nua che tants Grischuns vivan e nua che blers han pli baud studegià e fatg emprendissadis.

I dat dentant era motivs politics che motiveschan la festa. Uschia è il Grischun avisà d'avair

buns contacts cun la metropola economica.

Per «Grischun Vacanzas» è la motivaziun puspè in zic outra. L'unioni turistica beneventa la festa perquai ch'ella porscha ina giada la chaschun da «regalar» insatge als Turitgais. Els èn ils megliers hosps en ils hotels e sin las pistas grischunas. Il regal che «Grischun Vacanzas» fa als Turitgais è in solver cun products grischuns. Il solver la dumengia è gratuit e sa chapescha pon era ils Grischuns s'annunziar per quest event culinaric (annunziat sut 081 254 24 24). I na vegn dal reminent betg survì sulet paun, paintg, andutgels e chaschiel. I dat era pulenta e bizochels.

## Massa auter

«Züri retour» signifitgescha ch'ins po far be ina curta visita a Turitg, forsà cumbinar quella cun ina cumissiun e turnar svelto puspè a chasa. Occurrenz – e pia pretexts per ir a Turitg – porschan ils quatter dis sufficienta-main. Ina da questas occurrenz fiss era la premiera dal film «Chaus e muntognas» dad *Urs Frey*. U less insatge ina giada s'entupar cun *Ingrid Grave*, *Paul Accola*, *Iso Camartin*, *Marianne Cathomen*, *Peter Zinsli*, *Tonia Maria Zindel* etc?

**Questa chaschun han ins dals 5 fin ils 7 da settember en il «HB» a Turitg. Program ed infos detagliadas sut: [www.gr2003.ch](http://www.gr2003.ch)**



Remo Arpagaus, Andrea Masüger, Paul Weibel e Fortunat Frölich han stgaffi la «Revue grischuna» che vegn manada si en la halla da la staziun a Turitg. (da san.)